

VENDIM
Nr. 365, datë 26.4.2017

**PËR KRIJIMIN E BAZËS SË TË DHËNAVE SHETETËRORE “ARKIVI DIGJITAL I
ARKIVIT QENDROR TEKNIK TË NDËRTIMIT”**

Në mbështetje të nenit 100 të Kushtetutës dhe të nenit 4, të ligjit nr. 10325, datë 23.9.2010, “Për bazat e të dhënave shtetërore”, me propozimin e ministrit të Zhvillimit Urban, Këshilli i Ministrave
VENDOSI:

1. Krijimin e bazës së të dhënave shtetërore për Arkivin Qendror Teknik të Ndërtimit (AQTN), “Arkivi Digjital i Arkivit Qendror Teknik të Ndërtimit” (ADAQTN).

2. Sistemi i ADAQTN-së përmban të dhëna për:

- hartat plansheta;
- projekte ndërtimore dhe plane rregulluese;
- dosje pronësie (para viteve 1964);
- dokumentacione teknike (grafike) dhe shkresore (preventiva, recensa, detyra projektimi, korrespondenca, dorëshkrime, parashkresa teknike, vendime të këshillit teknik, vendime të këshillit të institucionit, procesverbale dhe llogaritje statike).

3. Institucioni administruar i bazës së të dhënave ADAQTN është Arkivi Qendror Teknik i Ndërtimit, nëpërmjet strukturës përkatëse, që mbulon çështjet e AQTN-së.

4. Të dhënat parësore dhe dytësore të ADAQTN-së janë, si më poshtë vijon:

4.1 Të dhëna parësore:

- Hartat plansheta;
- Projekte ndërtimore dhe plane rregulluese;
- Dosje pronësie (para viteve 1964);
- Dokumentacion teknike (grafike) dhe shkresor (preventiv, recensë, detyrë projektimi, korrespondencë, dorëshkrime, parashkresë teknike, vendime të këshillit teknik, vendime të këshillit të institucionit, procesverbale dhe llogaritje statike).

4.2 Të dhëna dytësore:

- Të dhënat që merren nga Regjistri Kombëtar i Gjendjes Civile (NID, emri, mbiemri, atësia, rruga, gjinia, vendlindja, datëlindja, mëmësia, kodZGJC, gjendja civile, emriNJQV, lidhja me kryefamiljarin, rrethi, qarku), sipas akteve ligjore në fuqi;

- Të dhënat që merren nga Regjistri Tregtar (NUIS, emri i subjektit, aktiviteti, data e regjistrimit, statusi i subjektit, adresa e subjektit).

5. Dhënësit e informacionit, sa i përket ADAQTN-së, janë:

- Arkivi Qendror Teknik i Ndërtimit;
- institucionet shtetërore;
- njësitë e vetëqeverisjes vendore (bashkitë).

6. Baza e të dhënave e ADAQTN-së ndërvepron me bazën e të dhënave shtetërore të Drejtorisë së Përgjithshme të Gjendjes Civile (Regjistri Kombëtar i Gjendjes Civile) dhe me bazën e të dhënave shtetërore të Qendrës Kombëtare të Biznesit (Regjistri tregtar), sipas ligjit nr.10325, datë 23.9.2010, “Për bazat e të dhënave shtetërore”.

7. Baza e të dhënave të ADAQTN-së ka 3 nivele përdoruesish (*user's levels*):

- Administrator;
- Përdorues;
- Sportelist.

Funksionet dhe të drejtat e secilit përdorues janë në përputhje me pozicionin e punës dhe të përcaktuara në procedurat e punës, të miratuara nga drejtori i AQTN-së për secilin nga punonjësit e tij.

8. Subjekte të interesuara për ADAQTN-në janë:

- qytetarët;
- bizneset;
- institucionet publike;

- AQTN-ja.

9. Subjektet e interesuara kanë nivel aksesit si lexues, lidhur me informacionin e vënë në dispozicion nëpërmjet portalit *e-albania*.

10. Ngarkohet Arkivi Qendror Teknik i Ndërtimit për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTRI

Niko Peleshi